

豫章叢書

第四冊

姜氏秘史卷三

明 弋陽姜 清撰

庚辰二年春正月丙寅朔天下司寺郡縣來朝免賀
靖難兵圍蔚州指揮李誠謀叛伏誅數日守將王忠
以城降遂進攻大同不克

先是誠出城哨探爲遊驍所獲譖素勇號冲天李
文廟釋而禮之誠欲獻城自效遂縱遣入城謀覺
繫獄死文廟乃悉眾登舊臺負土下築高與城齊
急攻之城乃降擢忠等官拘其妻子送北平遂以
其眾進攻大同

庚辰革韶州府翁源縣以其地并桂山巖巡檢司入於英德

革平越衛稅課司

增置萊州府慶豐庫大使二人

丙戌革平樂府昭平遞運所

改永州府祁陽縣湘江市巡檢司爲和平巡檢司

庚寅置應天府知候所於後湖掌冊人數設大使大

副使秩未入流

增本府通判一員

壬辰革四川行都司來遠驛

二月二日丁酉改漢陽府爲漢陽州更置官屬革僧
綱道紀司稅課司及漢陽縣儒學蔡店新灘二稅課
局桑臺湖馬影湖二河泊所百人礮巡檢司其蔡店
鎮巡檢司仍隸本州

壬寅詔禮部右侍郎兼翰林院學士董倫太常寺右
少卿高遜志考試天下貢士

時知貢舉官禮部尙書陳廵右侍郎黃觀同考試
官右拾遺朱逢吉史官吳勤葉惠仲趙友士徐景
旭又作張秉彝監試官御史王度俞士吉

黃觀字瀾伯一字尙濱池州貴池人父贊於同邑

許氏生觀遂從母家姓習尙書補邑諸生常作翠
微書舍讀書其間受業於元翰林待制黃俾大兵
入大都俾死之觀益砥礪以名節自許洪武庚午
貢入胄監是歲領鄉薦明年會試第一入對御試
策大要以天道福善禍淫之機人事練兵講武之
法爲言高廟嘉之擢狀元及第由翰林歷尙寶司
卿禮部右侍郎革除年間改官制增侍中員次尙
書以觀爲之仍掌尙寶司事奏復其姓與方孝孺
等日見親用靖難兵起觀奉命草詔極陳大義師
旣渡淮奉命徵兵上游諸郡入援觀奮不顧家且

行且募兵至安慶聞京師已定痛哭謂人曰吾妻
素有志節必不肯受辱遂招魂葬之江上明日家
僮自京逃來言當國者索傳國寶不得或言許尙
寶已赴上游起兵矣因命執其妻翁氏并二女配
象奴叱取釵釧出市酒穀翁攜二女率家屬十人
赴淮清橋下溺焉一云城南濠中觀舟次李陽河
聞上已出奔過池之建德而郡臣奉新皇帝卽位
今三日矣自分大事已去力不能支乃東向再拜
於羅刹磯湍急處縋舟人奮棹投水而死舟人急
鉤之僅得珠絲棕帽後追捕者得之以獻命購其

屍不獲有匿之者遂族觀家且逮其姻黨百餘人
坐繫詔獄仁廟初悉釋不問其謫戍邊徼者又數
十人景泰中進士邑人孫仁使遼有老卒朱黻者
給事使館亦以觀累戍黻故爲諸生嘗從觀游仁
問舊事且泣且言云翁氏池口人歿時有司收其
屍并二女具棺斂以待朝命不報天順中池人至
南京柳林破棺猶有存者詢之父老咸曰此黃狀
元妻女云近知縣龔守愚於所居故址學宮之西
立祠祀之或傳故尙書泰州儲曜家藏有觀集尙
存

王度字子中惠州歸善人嘗肆力經書稽理修詞
爲人所師部使者以明經儒士薦起家拜山東道
監察御史繩糾務持大體疏十餘上多見用高皇
帝棄羣臣諸藩不靖兵部尙書齊泰等會議軍事
度與僉謀庚辰會試俾度監之翕然稱得人時大
將軍曹國公李景隆北向敗績退保濟南以歷城
侯盛庸代之度密陳便宜無不可制勝者乃有東
昌之捷景隆徵還赦不誅又當軸用事惡庸等掩
已讒間遂行度等與謀者皆見疎辛巳夏六月濟
寧告急師徒屢敗將士皆異奕避敵度奏請募兵

王午春有小河之捷命度勞師徐州而還夏五月
鳳陽不守方孝孺與度等畫策誓死社稷秋七月
坐黨禍戍賀縣千戶所出語得罪合族被戮度死
年四十有七

葉惠仲台州臨海人兄刑部主事夷仲常雅爲方
孝孺所知有文名惠仲亦不愧其兄時稱二葉各
有集以傳惠仲初任廣武衛知事洪武末嘗以知
縣充修史官革除二年會試後陞知府永樂元年
二月二十二日戮死年六十四妻蕭氏爲奴

改南雄府爲州更置官屬

革保昌縣以所屬紅梅平田百畝三巡檢司隸於州

壬寅增置會川衛馬刺畢直金縣三長官司吏目

癸卯置滁州關山巡檢司

甲辰革贛州府長洛巡檢司

革南安府南康縣潭口鎮巡檢司

庚申考試官董倫等賜宴於禮部

陞都給事中秩正七品給事中秩從七品

辛酉革廬州道紀司無爲六安二州道正司巢縣道

會司

壬戌改五城兵馬指揮司爲五城兵馬司指揮爲兵

馬副指揮爲副兵馬

癸亥革行人司改行人於鴻臚寺

改大理寺左右寺正爲都評寺副司各設評事六員
甲子改都察院爲御史府革十二道置察院一設監
察御史二十八員司獄一員革司照磨檢校

詔曰頃以斷獄繁易御史臺號都察院與刑部分
治庶獄今賴宗廟神靈斷獄頗簡其都察院承漢
制爲御史員定爲二十八人務爲忠厚以底治平
乙丑革常德府九潭湖河泊所詔江西浙江蘇松人
仍授戶部官

洪武間以戶部掌錢糧勅禁浙江江西蘇松人不得除授至是除禁

三月丙寅朔帝御奉天殿以勅問試天下貢士賜狀元胡靖等及第出身有差

時奏策王艮第一上召諸進士問之以靖貌逾艮遂擢靖第一艮次之李貫又次之未幾授翰林院修撰良貫大見信用建安楊子榮亦以是年第二甲第三名賜進士出身除翰林院編修

靖初名廣字光大吉水人生八歲而孤自幼好學日記數千言至是廷試對策有親藩陸梁人心不

擢等語帝以爲敢言擢第一賜名靖除翰林修撰
擢侍讀附大宗復名廣拜翰林學士兼春坊大學
士爲上所知一時制誥戒諭之文多出其手詔修
五經四書性理大全命廣總裁嘗從上巡北虜出
居庸關入沙漠王師所至功烈炳耀廣記述之十
一年春上幸北京再扈從出塞滅虜還旣丁艱服
闋進文淵閣大學士兼春坊嘗上却封禪頌歷數
前代帝王厭務國事矯誣上天卒貽天下後世笑
時稱其有識又上騶虞神龜等頌以取媚自稱澹
庵之後喜談忠義事嘗集文山事蹟爲傳記序之

以傳卒年四十九果贈少師謚文穆與廣同時者
解縉楊士奇夏原吉楊溥楊榮黃淮金幼孜蹇義
輩皆攀龍附鳳爲時大臣云初靖難兵入撫州吳
溥爲應天學教授與靖艮解縉鄰三人者踰垣集
溥舍靖縉陳說大義靖慷慨艮弗言但流淚耳溥
曰三子名重受知日深事在頃刻若溥去就固可
從容三人去與弼時以童子侍嘆曰好胡叔能仗
節溥曰不然王叔死耳語未竟靖呼曰外面鬧甚
看猪溥顧嘆曰一猪不忍肯自忍乎須臾艮舍哭
聲震動矣縉乃馳謁文皇入見甚喜是日暮歸靖

復會縉曰情與君殊當自決縉給靖入房曰吾與
汝不死鑰之而去告文皇曰臣才不及靖方欲自
盡臣以人守之文皇曰盡與俱來對曰非臣力所
能須遣近臣數人喻以大義強之庶可文皇亟如
縉言靖既至文皇迎執其手曰好箇秀才如何從
我輩兒靖遂叩頭文皇大悅故信遇特甚亦縉推
重致之也至今靖支裔在庠序者人尙目爲猪仔
云

王艮字欽止吉水人建文己卯江西鄉試第一明
年廷試對帝親擢廣爲第一而以艮次遵洪武乙

丑事例著首甲皆授修撰良與第三人李貫皆與焉良間靖難師起居常憂輒不食日就羸憊以辛巳九月卒上憫之遣吏部侍郎黃觀諭祭良之家譜所述如此而吉安志乃曰文廟繼統先一日羣臣多往迎附良闔門與妻子訣是夜吞臙子死非其實也良子修亦首舉鄉薦云

己巳革詹事府爲御史府賜御史衣宴於新第詔大預宴

以都察院在太平門北不便朝叅改於此

壬寅以備榜舉人選署教諭訓導

詔年十九以下願選者聽給俸廩三年仍許會試
有登第者論其徒得中省試就進士合授官遞陞
一級無則止從合受其下第而有徒已中省試許
以實授教訓九載考滿黜陟其下第而徒皆不中
省試仍署職減半俸

癸酉革慶遠府忻城縣以其地入東蘭州

革臨江府新喻縣河泊所

革青州府壽光縣稻田店二遞運所

革高州府廣寧庫

癸未革辰州府麻陽縣僧會司